


ՔԱՐՈՉԽՕՍԱԿԱՆ



Տ. ՏԱԹԵՎ ԵՊՍ. ԶԱԿՈՐՅԱՆԻ ՔԱՐՈՉԸ՝ ԽՈՍՎԱԾ ԷԶՄԻԱՍՏԻ ՍԱՅՐ
ՏԱՃԱՐՈՒՄ ԽԱՉՎԵՐԱՑԻ ՏՈՆԻ ԱՌԻԹՈՎ

(17 սեպտեմբերի 2017 թ.)

Յանսուն Հօր եւ Որդւոյ եւ Հոգւոյն Սրբոյ. ամէն

«Սակայն քաւ լիցի, որ եւ պարծենամ այլ բանով,
քան միայն մեր Տեր Հիսուս Քրիստոսի խաչով,
որով աշխարհը խաչված է ինձ համար,
եւ էլ՝ աշխարհի համար»
(Գաղ. Զ. 14):

Սիրելի՛ բարեպաշտ քույրեր եւ եղբայրներ ի Քրիստոս,
Այսօր Հայ Առաքելական մեր Սուրբ Եկեղեցին նշում է իր Տաղավար
տոներէից վերջինը եւ Ս. Խաչին նվիրված չորս տոներէից ամենամեծը՝ Խաչ-
վերացի կամ Ս. Խաչի տոնը:

Ինչպէս շատ այլ տոների, այնպէս էլ այս տոնի հիմքում ընկած են
պատմական եւ իրական դեպքեր, որոնց մասին խոսում են պատմիչները
եւ որոնք համառոտ ցանկանում եմ ձեզ ներկայացնել:

610 թ. հզորացած Պարսկաստանի Թազավոր Խոսրովը հարձակվում
է Բյուզանդիայի վրա: 614 թ. Պարսկական զորքերը մտնում են Երու-
սաղեմ եւ գրավում քաղաքը: Շատերը սպանվում են, մյուսները գերի
են վերցվում, այդ թվում նաեւ Երուսաղեմի Զաքարիա պատրիարքը:
Պարսիկները մտնում են Սուրբ Հարության տաճար եւ գերի վերցնում
այնտեղ պահվող Սուրբ Խաչը, որի վրա խաչվել էր մեր Տեր Քրիստոս:
Բայց Քրիստոսի խաչը, հայտնվելով Պարսկաստանում՝ մի երկրում, որ
քրիստոնյա չէր, զարմանալիորեն մեծ հարգանքի է արժանանում: Ինչ-
պէս պատմիչն է նշում, շատերն ասում էին, որ քրիստոնյաների Աստված
իրենց հյուր է եկել:

Սակայն 622 թ. Բյուզանդիայի Հերակլ կայսրը վերսկսում է պատերազմը պարսիկների դեմ՝ Սուրբ Խաչը վերադարձնելու նպատակով: 628 թ. կայսերական զորքը մտնում է մայրաքաղաք Տիգրեոն, սպանվում է Պարսից թագավոր Խոսրովը, եւ Հաշտության պայմանագիր է կնքվում: Պայմանագրում հատուկ կետ է մտցվում խաչափայտի վերաբերյալ: Խաչը հանդիսավոր կերպով տեղափոխվում է հայոց Կարին քաղաք, այնտեղից Կոստանդնուպոլիս, որտեղից էլ վերադարձվում է Երուսաղեմ: Ամբողջ ճանապարհին Քրիստոսի խաչափայտը բարձրացվում էր վեր՝ ի տես ժողովրդի: Այստեղից էլ գալիս է տոնի անվանումը՝ Խաչվերաց, վերացումն Ս. Խաչի, այսինքն՝ խաչի բարձրացում:

Սիրելի՛ քույրեր եւ եղբայրներ, անշուշտ, Ս. Խաչին նվիրված այս տոնը միմիայն պատմական դեպքերը հիշատակելու համար չէ: Մեզ համար, իբրեւ աշխարհում առաջինը Տիրոջ Լույսը ճանաչած քրիստոնյա ժողովուրդ, Ս. Խաչը մեծագույն խորհուրդ ունի: Երբ ասում ենք խաչ, հասկանում ենք չարչարյալ, խաչեցյալ, բայց միեւնույն ժամանակ հաշտություն առած եւ հաղթանակած Փրկչին: Պողոս առաքյալն ասում է. «Կորսրյան մայրնվածների համար խաչի քարոզությունը հիմարություն է, իսկ մեզ՝ փրկվածներիս համար՝ Ասրծոգորություն» (Ա. Կորնթ. Ա. 18):

Ինչո՞ւ է այդպես: Պատասխանը շատ հստակ է: Որովհետեւ խաչի մահվամբ ու հաշտությամբ Քրիստոս մեզ նոր կյանք պարգեւեց: Մենք հեռացանք Աստծուց, լքեցինք Տիրոջը, բայց Աստված երբեք մեզ մենակ չթողեց ու նույնիսկ Իր Միածին Որդուն տվեց, Ով մեր փոխարեն խաչը ելավ: Մենք գիտենք, որ խաչը հին աշխարհում մահվան գործիք էր՝ նախատեսված ծանր հանցագործների ու մարդասպանների համար: Բայց Քրիստոս անմեղ էր, ինչո՞ւ անմեղ մեկին խաչեցին: Այստեղ էլ հարցի պատասխանը հստակ է. Քրիստոս մեզ համար մեռավ, Քրիստոս մեր մեղքերի համար խաչվեց եւ մեր փոխարեն Ինքը հատուցեց: Մեր Տեր Հիսուս Քրիստոս Իր արյունը հեղեց խաչի վրա, եւ խաչը դարձավ այն գոհասեղանը, որի վրա թափված արյունով սրբվեց համայն մարդկության մեղքը: Հովհաննեսի Ավետարանում ասվում է, որ «Ասրված այնքան սիրեց աշխարհը, որ նույնիսկ Իր Միածին Որդուն տվեց, որպեսզի ով Նրան հավատա, չկորչի, այլ հավիտենական կյանք ունենա» (Հովհ. Գ. 16):

Սիրելիներ, յուրաքանչյուր հայ եւ ընդհանրապես յուրաքանչյուր քրիստոնյա այս կյանքում իր խաչն ունի եւ անցնում է խաչի իր ճանապարհը, որը փշոտ, դժվարին ու նեղ է, սակայն տանում է դեպի հավիտենական կյանք: Եվ ընթանալ այդ ճանապարհով, նշանակում է անցնել

նաեւ նեղությունների ու զոհողությունների միջով, նշանակում է պատ-
րաստ լինել՝ կրելու այդ խաչի թե՛ դժվարությունը եւ թե՛ քաղցրությու-
նը, բայց միշտ հիշելով, որ մեր կրած փոքր նեղությունները համեմատելի
չեն Քրիստոսի կրած սոսկալի չարչարանքների հետ: Քրիստոս ասում է.
«Մտե՛ք նեղ դռնով. ինչքան լայն է դռորը և ընդարձակ՝ ճանապարհը, որ դեպի
կորուստ է տանում, և բազմաթիվ են նրանք, որ մտնում են դրանով: Ինչքան նեղ
է ճանապարհը, որ տանում է դեպի կյանք, և սակավաթիվ են նրանք, որ գտնում
են այն» (Մատթ. Է. 13-15):

Ս. Խաչի փրկարար զորությունը մշտապես ներկա է եղել եւ այսօր էլ
շարունակում է ներկա լինել հայ մարդու եւ ընտանիքի կյանքում: Պա-
տահական չէ, որ Հայ Եկեղեցում ամեն ինչ օրհնվում ու սրբադործվում
է Ս. Խաչով: Մեզ համար խաչը փրկության ճանապարհն է, եւ ընթանալ
փրկության այդ ճանապարհով՝ նշանակում է պատրաստ լինել զոհողութ-
յունների հանուն Քրիստոսի, որոնք միայն մաքրում են մարդու հոգին
եւ վերափոխում նրան: Պողոս առաքյալն ասում է, որ մեզ՝ փրկվածնե-
րիս համար խաչը Աստծո զորությունն է, այսինքն՝ ամեն անգամ, երբ
մենք խաչակնքվում ենք, խաչի նշանն ենք դրոշմում մեզ վրա, զգում ենք
Քրիստոսի ներկա զորությունը մեր կյանքում:

Ս. Խաչի փրկարար զորությունը մշտապես ներկա է եղել եւ այսօր էլ
շարունակում է ներկա լինել հայ պետականության եւ հայի ինքնության
կերտման ու պահպանման սրբազան առաքելության մեջ: Դարեր շարու-
նակ մենք Ս. Խաչի նշանով հաղթանակել ենք ոչ միայն չարի աներեւույթ
զորություններին, այլ նաեւ հայ ժողովրդի տեսանելի թշնամիներին, ով-
քեր ցանկանում էին բնաջնջել հայի տեսակը: Եվ ինչպես Քրիստոս հա-
րություն առավ, այդպես էլ հայ ժողովուրդը մշտապես Տիրոջ Ս. Նշանով
հառնել է մոխիրներից եւ հարություն առել՝ որպես Տիրոջ ընտրյալ ժո-
ղովուրդ:

Սիրելի՛ ժողովուրդ հայոց, մենք պետք է հավատարիմ մնանք այն
խաչին, որ մեր նախնիներն իրենց ամեն հոգով, սրտով, նույնիսկ նա-
հատակության գնով պաշտպանեցին եւ մեզ հանձնեցին, որպեսզի մենք
էլ մեզանից հետո եկող սերնդին նույն հպարտությամբ ու նախանձա-
խնդրությամբ հանձնենք այն՝ ի վայելում եւ ի պահպանություն: Փշոտ
ճանապարհներ են անցել մեր նախնիները հանուն մեր սրբությունների
պաշտպանության, եւ եկեք այսօր մենք անտարբեր չգտնվենք այն նվի-
րական արժեքների հանդեպ, որոնց համար արյուն է թափվել եւ նահա-
տակություններ են եղել: Շատ հաճախ մենք պարծենում ենք, որ առաջին

քրիստոնյա ժողովուրդն ենք աշխարհիս երեսին, իրապես հպարտություն է, բայց եկեք գործերով փաստենք, որ արժանի ենք այդ պատվավոր կոչմանը: Խաչն իբրեւ զարդ կրող, հնամենի վանքերի ու եկեղեցիների պատերը փչացնող, սրբություններն անարգող, նախնիների հավատն ուրացող, կեղծ արժեքներ դավանող հայ մարդը չի կարող արժանի լինել առաջին քրիստոնյա ժողովուրդ կոչմանը: Ամեն շահ, կեղծ արժեքներ, նյութական բարիքներ անցողիկ են, սիրելիներ՝, ինչպես անցողիկ է մարդկային մարմինը, քանզի հող էր եւ հող պիտի դառնա: Մինչդեռ անմահ է հոգին, անմահ են մեր հայրենանվեր գործերը՝ հանուն Աստծո, Հայրենիքի եւ Մայր Եկեղեցու:

Եկեք վերադառնանք այն ճշմարիտ արժեքներին, որոնց համար արյուն է հեղվել, ճակատագրեր են խեղվել, որոնց համար խաչի ճանապարհ է անցել մեր ժողովուրդը, բայց միեւնույն ժամանակ հարուժյան ու լուսավոր ապագայի տեսլականով, հզոր ու անկախ պետականություն ունենալու երազանքով՝ համախմբված Հայ Առաքելական մեր Մայր Եկեղեցու սրբազան կամարներից ներս:

Սիրելի՛ հավատացյալ հայորդիներ, եկեք երբեւէ չթուլանանք մեր հավատի մեջ ու չհուսահատվենք, չերկմտենք ու աներկբայորեն հավատանք Տիրոջը՝ կրկնելով Պողոս առաքյալի հետեւյալ խոսքը, որ ասում է. «Բանձ լիցի, որ ես պարծենամ այլ բանով, քան մեր Տեր Հիսուս Քրիստոսի խաչով» (Գաղ. Զ. 14):

Իրապես, թող Տիրոջ Սուրբ Խաչի նշանը մեզ համար պարծանք լինի եւ պահպանի ամեն տեսակ փորձություններից: Հավատարիմ լինենք մեր Մայր Եկեղեցուն, սրբություններին, քրիստոնեական արժեքներին, մինչեւ անգամ այդ արժեքների համար խաչվելու եւ նահատակվելու աստիճան՝ ի պայծառություն Հայ Առաքելական Սուրբ Եկեղեցու եւ ի զորացումն մեր Սուրբ Հայրենիքի. ամեն:

